

四庫全書

集部

欽定四庫全書

集部

茶山集卷五

詳校官右中允<sub>臣</sub>薩敏

主事<sub>臣</sub>呂雲棟覆勘

總校官編修<sub>臣</sub>王燕緒

校對官修撰<sub>臣</sub>吳錫齡

謄錄監生<sub>臣</sub>張元功

欽定四庫全書

茶山集卷五

七言律詩

辭召命呈子忱侍郎

嬾慢無端世所遺，獨憐衰病少光輝。  
惠然投我有華袞，何以報公無紵衣。  
未學虛聲慚取譽，舊章多識恐成非。  
侍郎清鑒懸明鏡，莫道塵埃一點飛。

宋 曾幾 撰

王周士顯謨自閩中歸為山舊隱道經臨川惠然  
先辱且出示呂居仁送行詩有見及語因次其韻

贈周士

此生寡偶固其宜何況身從老得衰門外設羅誰一顧  
道旁傾蓋子相知斷金已定交遊事伐木仍傳故舊詩  
聞說為山堪避世卜鄰他日更無疑

雪中陸務觀數來問訊用其韻奉贈

江湖迴不見飛禽陸子殷勤有使臨問我家居誰暖眼

為言憂國只寒心官軍渡口戰復戰賊壘淮濡深又深

坐看天威掃除了一壺相賀小叢林

務觀所結菴號小叢林云

陸務觀效孔方四舅氏體倒用二舅氏題雲門草

堂韻某亦依韻

陸子家風有自來胸中所患卻多才學如大令倉盛筆

寺本王子敬宅有筆倉

文似若耶溪轉雷襟抱極知非世俗簿書

那解作氛埃集賢舊體君拈出詩卷從今鹽水開

以湯餅招韓伯周王巖起二提舉鄭深道曾宏甫

二使君宏甫有詩次其韻

鏡湖淮瀆舊刺史盧阜赤城新使君敢持湯餅一取飽  
更用尊酒重論文玉川遣奴致雙鯉吏部呼兒書八分  
不如哦君七字句舉首看度南山雲

曾宏甫見招看海棠而郡城新有更初闔扉之令  
予聞鼓亟歸一詩呈宏甫

西蜀名花得許穠晚來呼客醉花中可憐朵朵枝枝弱  
自占深深淺淺紅收拾雖微少陵老寵光還有翰林公

無聊獨出城闌去燒燭看時恨不同

次曾宏甫社日賞海棠吳守宅且試新茗韻

一樹深深地主家外邊誰復見穠華却因社日治聲酒  
得醉春時近眼花著粉施朱俱悵當吹風洗雨但驚嗟  
酴醾芍藥垂垂發更試頭綱一餅茶

蘇秀道中自七月二十五日夜大雨三日秋苗以  
蘇喜而有作

一夕驕陽轉作霖夢回涼冷潤衣襟不愁屋漏牀牀濕

且喜溪流岸岸深千里稻花應秀色五更桐葉最佳音  
無田似我猶欣舞何況田間望歲心

喻子才提舉招昌源觀梅倦不克往蘇仁仲有詩  
次韻

問公何許看花回賸說郊垌十里梅樹雜古今他處少  
枝分南北一齊開昌源已辦行厨去離渚猶須使節來  
況復蘭亭公所葺清流九曲要傳杯

聞降湖北提鹽



一為散吏寄郊坳三見南山木葉零  
病著不能朝帝所  
老來只合奉祠庭  
繡衣玉節官仍作  
音佐流水桃花路再  
經洞口故人應問我  
淹留何處髮星星

### 南山除夜

薰風吹船落江潭  
日月除盡猶湖南  
百年忽已度強半  
十事不能成二三  
青編中語要細讀  
蒲團上禪須飽參  
兒時顏狀聽渠改  
瀟湘水色深掞藍

### 喜聞天兵已臨衢寇

野宿溪行各晏然吳頭楚尾接風烟豈知苻澤深為崇  
不道柯山最近天境上音郵多浪語殿前兵馬是真傳  
未能日報書三捷竹簟紗厨到曉眠

至日述事時江海大捷

觀臺四望楚氛開雲物輪囷瑞九垓大雪山陰消得盡  
微陽井底放令回江心阜幟千艘沒海角黃旗一騎來  
想像天顏知有喜正衙入賀薦金罍

寄泉南守趙表之

天遣高人下別峯

表之雙塔所居  
一軒號別峯

諒無官事汨胷中香

來海外沈煙碧果熟林間荔子紅  
曹植詩篇疏入社裴休參問遠同風  
蕭然大室維摩詰何日文殊對此翁

寄浙漕韓公圭璣

故人官達更相求不但寒溫札翰投  
深貯爐薰來嶺海遠包書帙到林丘  
未知輓粟飛芻外尚及哦詩把酒不  
千里往還殊不隔夢魂常繞日邊州

寄浙東參議鄭禹功

憶昨分攜自日邊星辰忽忽幾回天故人老作諸侯客  
今我初無二頃田安得詩書同保社敢煩札翰訪林泉  
萬山不隔襟期處賴有渠儂一味禪

禹功參禪有省

寄十扇與陳述之

饒陽輕篋人共知封書寄與今其時清風兩腋想披拂  
明月千里能追隨一朝貴重得謝傳中道捐棄憐班姬  
吾徒且當置是事魯縞如雪題新詩

寄信守徐穉山侍郎

歸去來兮莫問津有船即買繫江濱自應一學陶元亮  
不用更呼祁孔賓已卜春前春後日重尋水北水南人  
使君為我新茅棟數有書來意甚真

寄何晉之直閣

別來不寄一行書貝葉琅函想自娛喜得直廬新內閣  
夢成同舍舊東都絕知筆底騫騰在未省體中安穩無  
見說閩山小兒子黃緣即罷數趨隅

寄提舶王季羔

外臺隱吏極風流記得衰翁舊日不三島十洲曾接武  
千巖萬壑更從遊官曹閒似雲間鶴賈舶紛如海上鷗  
幸有西湖應著我時操艇子過明州

撫州呈韓子蒼待制

一時翰墨頗橫流誰以斯文坐鎮浮後學不虛稱吏部  
此生曾是識荊州相逢未改舊青眼自笑無成今白頭  
聞道少林新得髓離言語次許參不

子蒼攜賀章見過用韻為謝

胡嶺三年自竄流歸來差慰此生浮  
政緣天下無雙士  
非為江東第一州  
懸榻坐中難入眼  
設羅門外少回頭  
袖詩不意高軒過  
問里人曾到此不

次子蒼追憶館中納涼韻

飯罷蓬瀛饌響廊薰風啜茗倚繩牀  
草荒老氏藏書屋  
山繞王家避世牆  
湯餅承公薦槐綠  
爐芬遣我夢芸香  
欲論舊事愁無奈  
願挽天河作酒漿

聞李泰發參政得旨自便將歸以詩迓之

苦遭前政墮危機二十餘年詠式微天上謫仙皆欲殺  
海濱大老竟來歸故園松菊猶存否舊日人民果是非

最小郎君今弱冠別時聞道不勝衣

案瀛奎律髓註秦檜謫趙丞相鼎李

參政光胡編修銓于海外必欲殺之趙先歿李胡皆  
生還又最小郎君原註謂孫壻文授今附識於此

### 李子長縣丞示詩卷

乃祖天邊太白星裔孫名字見家聲官曹卑似崔斯立  
句律清如庾義城贈我不知相報答投人政恐未分明  
丞哉于子元無負松竹成陰水亂鳴



汪彥章內翰除守臨川以詩賀之

臨川內史詔除誰里巷傳聞報客知  
金馬門深曾草制  
水精宮冷近題詩  
行看畫省旌旗入  
定把書麟筆札隨  
若訪毗耶舊居士  
無人問疾鬢成絲

賀曾表甫得解

南風盛事昔無聞  
乃祖詞場筆有神  
一膀豪英收幾士  
同年伯仲看三人  
今君科第欲驚世  
他日文章當致身  
意慊歸來能訪我  
亦令宗派倚生春

吳元中少宰復官守長沙以詩賀之

眼看亂後幾週年神護靈光獨巋然

靖康宰相六人惟公在矣鏡裏

未添新白髮囊中初得舊青氈寄書地正當回鴈晤語  
身方走跼薦社稷于公端可卜一篇江漢詠周宣

題徐子禮自覺齋時子禮為江陰抱麾之行

徐子長吟復短吟奇書牕下日幽尋誰知密密深深地  
參得明明了了心千里澄江空更濶中秋素月古猶今  
使君胸次端如許願以餘光照所臨

題巾山廣軒次韓无咎韻

鈴齋偈仄未銷憂暇日聊為恰憤遊喬木中間藏古寺  
藍輿直上得名流豈無雲水連孤嶼亦有山林望一州  
後日玉霄峯頂去憶經行處為回頭

張子公招飯靈感院

竹輿響肩舡啞啞芙蓉城曉六月秋露華猶泣草光合  
晨氣欲動荷香浮給孤獨園賴君到伊蒲塞供為我羞  
僧牕各自占山色處處薰爐茶一甌

呂居仁力疾作詩送行次其韻

雪屋風牕逼歲窮一杯情話與誰同  
向人寡偶無如我抵老相知獨有公  
文字欲求千古事簿書還費二年功  
新詩已佩臨分語况復哦詩是病中

次韓叔夏送行韻

乃祖曾為文送窮兒孫氣味畧相同  
立朝有疏慕汲直去國無書干子公  
竹椅蒲團深著意雪牕螢案坐收功  
自憐無補朝廷事又向蠻煙瘴雨中

次蘇守朱新仲舍人留會稽之行韻

公知此老發船時不作河梁送別詩但說江湖留我住  
為言巖壑與人期凝香燕寢定自好懷綬稽山無不宜  
早晚歡迎剡溪上去公亦復意遲遲

適越留別朱新仲

扁舟綠漲漕渠時解釋離懷政用詩管鮑交朋無變態  
朱陳嫁娶有佳期長洲茂苑著身久秦望鏡湖行腳宜  
二浙中間才一水短書莫使寄來遲

寓居有招客者戲成

蓬蒿小院立秋天  
禿鬢淒風雨颯然  
丈室何人問摩詰  
後堂無地著彭宣  
牀頭白酒新浮甕  
案上黃詩屢絕編  
不厭寒家淡生活  
書牕期與子周旋

次勸農韻

典郡治中總得賢  
郊原一出萬人傳  
山行野渡時時雨  
婦餉夫耕處處田  
說與老農無罪歲  
但當力作有逢年  
驅兒播種貧家事  
可奈西疇只仰天

處守謝景思寄勸農詩次其韻

使君小隊出田間，卻擁旌旗鼓吹還。  
走送勞農詩後逸，懸知領客事清閒。  
坐曹已白兒時鬢，置酒聊朱病後顏。  
無路從公上烟雨，夢魂長遶處州山。

乙卯歲江南大旱七月六日臨川得雨奉呈程伯禹待制

縹緲爐煙上帝閭，朝來一洗旱如焚。  
壟頭無復成龜兆，水面初看起縠紋。  
政使夏畦炊白玉，未妨秋稼割黃雲。

使君閔雨心猶在化得邦人不茹葷

時屢禁屠宰

空公長老一出即住雪峯書來以建茗為寄長句

奉呈空公時以筆硯作佛事也

此公出世使人驚道眼看來卻未曾政爾雪峯千百衆  
澹然雲水一孤僧不妨詩筆作佛事已用茗甌傳祖燈  
我老尚堪行腳在因風為寄古崖藤

送曾宏甫赴光山守

千里光山去拊循長淮練靜屬城闔開門自少公家事



領客寧無我輩人  
網戶得魚肌切玉  
兵厨有酒色鎔銀  
老翁生死誰相訪  
札翰時時到水濱

曾宏甫到光山遣送鵝梨淮魚等數種

吾宗席未暖淮濱  
遣騎持書賸送珍  
美實來從壓沙寺  
巨魚長比藉糟人  
欲雕好語略為報  
但愧新詩如有神  
領客不無桃李樹  
知君憶著故園春

次秘丞李希聲錫新省韻

吾皇德澤小滄溟  
倒載干戈不用刑  
天以圖書效河洛

人如蘭玉秀堦庭石渠盡日蓬山影金殿凌虛帝座星  
從此崇文三萬卷權輿甲部聖師經

次何德器見贈韻

德器交情素所敦乃翁雖逝典型存不惟歆向皆書府  
况復封胡是相門意氣君方凌碧落年齡我已到黃昏  
今晨鏡裏如膏沐歡喜仁人有贈言

和李宗丞

海邦西渡即朝廷雙闕瓊臺天下名跋馬望君真屢矣

拏舟過我太遲生門闌不日登元禮句律今朝得少卿  
已辦黃花一尊酒有如江水莫寒盟

次馮子容主簿信州築居韻

聞君卜居水雲鄉欲往從之各異方屋角樹陰傾老蓋  
溪南山色過浮梁薰風自在翻書葉梅雨相欺敗堵牆

長缺高歌歸去好幽棲為我覓陽岡

老杜卜居詩要求陽岡暖一作與君

勝日杖  
崇岡

鄭深道錢曾宏甫台州之行見招風雨不能度溪

橋作此贈宏甫

一觴相屬費招呼況復吾宗攬轡初  
春雨春風俱作惡溪南溪北頓成疎  
刻殘紅蠟君哦句挑盡青燈我讀書  
細故乖違猶似此功名不必問何如

送曾宏甫守天台

莫作陽關墮淚聲丹丘勝事要君聽  
興公賦裏雲霞赤子美詩中島嶼青  
天近豈無宣室召地偏猶有草堂靈  
鑾坡飛上勤回首記取來游舊客星

送李似舉尚書帥桂州二首

桂林佳事我能言  
四座停杯且勿喧  
人物豪華真樂國  
江山清絕勝中原  
親嘗荔子薰風浦  
靜對梅花小雪村  
邊鎖無虞庭少訟  
不妨仙釋問真源

整整三朝玉筍班  
幾年流落奉祠官  
不令歸曳尚書履  
亦合先登大將壇  
從昔南荒除帥重  
只今西顧倚公寬  
長途不惜身為御  
欲上龍門自作難

送周德修侍郎守武陵郡

傾蓋江頭許定交談經論事聽忘勞轍環萬里猶持橐  
門掩三秋却夢刀流水落花公境界摘山煮海我官曹  
人生五馬從來貴行樂何須歎二毛

送王亞之

執手河梁有贈言檣烏端為小留連無風浪起勤看客  
不盡江來穩放船煙雨樓臺空夢到雲天鴻鴈只書傳  
不須更問西歸日定是彤庭射策年

送蘇伯益提幹代還侍下

伯充之孫  
伯業之子

幕下官曹寄玉溪溪邊野老借光輝  
齧氎校尉衝寒去  
扇枕郎君觸熱歸  
大父正攜靈壽杖  
尊公更著老萊衣  
贈行未說功名事  
此事如公世上稀

送王宣子赴廬陵守

秋風送遠廬陵守  
車騎光華鬢未斑  
早歲名高天下士  
同時身到海中山  
淹回二水分流處  
邂逅千巖競秀間  
行矣衰翁如未死  
錦衣白晝候君還

送賀子忱參議之官閩中

越侯賓客有輝光領袖今年得望郎詩似拾遺留劍外  
才如處士去河陽到時晚荔論園買舊日春茶洗盞嘗  
壁水同寮幾人在賸將書疏及滄浪

送路應求赴郢守

一雨全清去路塵石城風物話臨分了無獄訟勞官長  
賸有江山奉使君樓上今誰能和曲鼻端那復可揮斤  
吾人莫道知音少千里歡謠入聽聞

送尹叔

東珣

之象州



歲星一別又回天貧賤交情老更堅傳世典型清徹骨  
向人懷抱直如絃經營象郡三椽屋漂泛龍城一葉船  
風雨蕭蕭難自曉此心常與子周旋

送呂倉部治先守齊安

案瀛奎律髓注呂倉部大器字治先茶山之壻是生

東萊先生今附識于此

齊安剖竹要循良分付吾家坦腹郎賸有江山連赤壁  
略無訟獄到黃堂鈴齋晝永宜深念邊鎖秋高合過防  
此地元之餘烈在勉旃幸未鬢毛蒼

送周仲固寺正提舉湖北茶鹽余建炎己酉歲嘗  
為此官

洞庭湖北飽知聞嘗以輜軒犯楚氛遠有光華新令尹  
分投閒散故將軍武陵源口自碧水古德山頭多白雲  
一路澄清縱幽討不妨書札細論文

送方務德將漕廣西時余亦有此除

壯時一別鬢成絲忽漫同盤又語離底事不為三日款  
相逢猶是半年遲溪邊贈策正楊柳境上開尊應荔枝

莫歎嶠南荒絕好光華最有遠人知

送晁恭侍郎守臨川

才猷表表自名卿何況傳家烜赫聲  
道院老人真乃祖雪堂高弟是諸兄  
一牛鳴地正接跡五馬行時尤見情  
擬峴登臨試回首小軒應記碧山橫

送紹興帥湯相得請洞霄歸括蒼二首

武公八相不虛傳奏牘求閒卻更前  
聖主閔勞天下士詔書許作地行仙  
少微星分臨江左大滌山門鎖日邊

便以公歸良易耳午橋雖好莫留連

誰言富貴踐危機永日深春故里歸  
烟雨高樓增意氣蓬萊傑閣少光輝  
向來赤舄又遵陸此去青鞋長掩扉  
畫戟門東是茅宇鈴齋想像獨依依

送逮子赴秋試江西漕司

有詔詞場獵俊英西風匹馬豫章城  
欲追諸父鴈行上肯逐羣兒魚隊行  
金是莫邪當自必璞非死鼠會相明  
筆端妙處還知否萬里秋天壯氣橫

示逢子

清臞骨相類諸生  
龜勉寒牕守一經  
用賦要窺司馬室  
學詩頻過伯魚庭  
可憐親髮鏡中白  
莫負子衿身上青  
五桂蔭門家  
世事寂寥天畔幾回星

同逢子韻寄逮子促其歸

九日清尊要及辰  
誰令形迹滯甌閩  
饒陽城畔趨庭子  
長樂坡前入幕賓  
竝倚門閭吾二老  
相求原隰汝三人  
借令不共黃花酒  
莫與西風作後塵

逮子得龍團勝雪茶兩胯以歸予其直萬錢云

移人尤物衆談誇持以趨庭意可嘉鮭菜自無三九種  
龍團空取十千茶烹嘗便恐成災怪把玩那能定等差  
賴有前賢小團例一囊深貯只傳家

用逮子韻奉贈鄭禹功參議

雨餘依砌上蒼苔竟日山房閉不開下馬厭聞生客至  
敲門喜見故人來長哦綠竹詩三疊小酌黃花酒一盃  
竹菊皆小  
圃有之  
此外相看復何事團蒲隱几湛靈臺

次錢處和贈赴召之行韻

蒼顏白髮海邊州，敢與君王側席求。  
水似篙深催我去，雨如絲下要人留。  
偶然結綬登畿左，不用攀轅擁道周。  
高卧耦耕吾有分，何心賜璧取封侯。

留別三姪

僧窻又與汝周旋，百感相隨到酒邊。  
無復吹簫如異日，空驚枕塊已三年。  
一門叔父吾衰矣，東閣郎君但勉旃。  
不為懷金紆紫事，澡身玉雪是空傳。

春來聞故舊多云亡者作詩示同志

鴈足曾無一字收有時書到卻生愁故人疊疊半黃壤  
今我蕭蕭全白頭大抵百年皆逝水可憐萬事只浮漚  
朝聞夕死真吾道聖處工夫辦得不

次鄭禹功韻

怪底消除執熱煩鄭公方丈接三韓空餘坐榻懸犀柄  
豈有行厨洗玉盤作吏忽驚玄鳥變尋盟未向白鷗寒  
諸山只在登臨眼安得陪君杖履看



次招客見贈韻

夏夜僧牕淡月籠新涼絕類九秋中麴生入座有清濁  
荔子堆盤能白紅持此淹留數佳客慰予牢落一衰翁  
驪駒散後君知否獨臥山房竹裏風

次徐惇立韻

此身那得作飛仙魂夢相從但欲眠極目參辰不相見  
論心膠膝未為堅別君甲子三千日問我春秋七十年  
久要不忘吾輩事交情自昔幾人全

次王元渤問余脫齒韻

齒危但以粥充虛辜負公家夏屋渠

舊說夏屋大具渠勤也言設大具其

意勤勤然

政恐麴生深作祟可憐髯簿頓成疎

炙穀子謂羊為髯須主簿

動搖不減韓吏部蹴踏非同焦校書落勢今年殘未已  
祇應從此併無餘

吳帥見和亦復次韻

案此詩前似有倡和一首為錄者佚去

九日心飛類瑄灰龍山直上好樓臺老身稚子扶將去  
勝地元戎借得來酒似朝霞披霧散詩如秋菊艷霜開

至今研席珠璣滿莫道登高寂寞回

次憂字韻

案此詩前似別有次某人某字韻一首亦錄者佚去

公家伯仲世名流畫省歸來共樂憂  
稍喜對牀聽夜雨永懷扇枕作涼秋  
誰言小草能蠲忿未信閒花可療愁  
惟有塤箎發清吹渠儂無厭亦無求

挽韓子蒼待制

佩聲曾到鳳凰池不盡胸中五色絲  
三黜本因元祐學一飛合在中興時  
忽驚地下修文去太息門邊問字誰

猶想泉臺有新作郊原小雨欲催詩

挽鄭禹功

鄭公高義絕陳雷別我姑胥首重回書跡橫斜良足喜  
訃音曲折可勝哀定知泡影垂垂盡故傍江湖得得來  
俗眼看公終未是無生滅處詠歸哉

挽梁元功

朋儔大半白頭新臭味同流少似君交契雖深淡如水  
宦情何翅薄于雲安知暮景鶯聲谷遽作高原馬鬣墳

忍向西風歌薤露畧無好語頌清芬

挽陳丞相

中興論相得耆英進退能為國重輕有望臨人山泰華  
無私待物器權衡兩朝禮貌緣同德多士憑依為至誠  
自古元臣薨位少一時生死極哀榮

悼雲泉勤庵主

正坐長齋早得衰

師持齋未嘗少破

中年一病莫醫治懸知水

複山重地難度風饕雪虐時乘興前村曾有約

師有前村尋梅

之寄聲絕頂可無詩師病甚猶寄聲禪房手自栽花木

付主林神好護持庵中花木皆師手植

茶山集卷五

欽定四庫全書

茶山集卷六

宋 曾幾 撰

七言律詩

上元日大雪

句芒整轡決辰間，雲片相隨大可觀。  
挑菜園林有餘潤，燒燈庭院不勝寒。  
柳條弄色政爾好，梅蘂飄香殊未闌。  
便似落花飛絮去，直疑春事併哀殘。

寒食只旬日間風雨不已

年光胡不少留連熟食清明又眼前敢望深宮傳蠟燭  
可堪小市禁炊煙滿城風雨無杯酒故國松楸欠紙錢  
老病心情冷時節只將幽策替幽禪

寒食與客遊東湖

官曹顏狀滿塵埃負郭陂湖眼為開春色少留如過客  
賞心多病只寒灰黃童白叟喜相告早蓋朱幡能一來  
日暮遊人歸去盡沙頭鷗鷺與徘徊



久雨

誰言春雨散如絲  
一月垂空似綆縻  
雲去雲來何日了  
花開花落不曾知  
直愁排蕩根荄盡  
安用栽培桃李為  
政恐東君不無意  
十分妍暖乞醅醺

上方

前朝蘭若舊聞名  
絕頂禪房日月鄰  
木潤山輝應有物  
錫飛梧渡不無神  
郊垌行去僅百里  
郡郭往來今十春  
未踏青雲梯一級  
會當齊侶箇中人

遊姑蘇張氏園二首

郭內名園舊所聞，扶攜老穉及良辰。  
重重碧樹深留客，一一華堂極可人。  
綠暗池塘初破夏，清和時節尚關春。  
憑誰說與滄浪水，早晚芒鞋去問津。

雨近黃梅細不聞，破牕夜夜看星辰。  
園林如許不行樂，魚鳥有知應笑人。  
盛喜晴天容卜晝，絕憐小塢解藏春。  
何妨著我閒田地，坐看垂楊夾廣津。

遊橋南竹園

杖屨橋南訪此君  
別君安否斷知聞  
苦遭積雨來為祟  
政得新晴為解紛  
直幹萬餘森碧玉  
高標一半入青雲  
人言歲暮於吾子  
踏雪相看未當勤

遊滄浪亭詩

丘壑園林得我驚  
茲遊便足了餘生  
飛來嶓冢橫空翠  
流出滄浪徹底清  
探討不遺幽士力  
招邀難得主人情  
波間漁父還知否  
已挂朝冠不濯纓

遊虎丘

誰能竟日把書看蕩漿扶筇十里間未辦深藏豹林谷

不妨時到虎丘山秋來千頃境絕麗

寺有千頃軒取東坡詩雲水麗千頃

之老矣北牕人極閒

余家居書齋以北牕名之取陶淵明語

忽見題名在

塵壁餘生那得許堅頑

庚辰歲與榮茂實凌明甫林仲純沿長老會致爽堂題名今惟

明甫與余在耳

### 過松江

家在朱簾畫舫中今朝誤入水精宮江澄不起無風浪  
天遠長垂未霽虹酒熟梧盤供雪鱠詩成島嶼落霜楓

帆來帆去何曾歇萬頃煙波屬釣翁

信衢道中溪流不通全家遵陸

客情厭楚卻思吳白鷺汀洲政起予  
渴雨溪流妨進艇  
得晴山路稱騎驢  
滿林霜著春相似  
半嶺雲橫雪不如  
匹馬四方男子事  
饒陽況不是吾廬

風月堂二首

西湖地僻少人知  
隱吏官曹占作池  
浩蕩芙蓉風過夜  
扶疎楊柳月明時  
雖多不用一錢買  
縱少足供千首詩  
但

使尊中深貯此卮刀細薄可無飢

索卮刀二字未詳今無別本可校姑仍其舊

青羅熨鏡正揩磨上有虛堂發興多大熱端能排酷吏  
廣寒只合在嫦娥又成畫舫珠簾去可奈紅妝翠蓋何  
縱使曲肱無別夢一尊風月弄婆娑

卽事

野寺山家兩寂然小牕下有白頭禪微風不動爐煙直  
永日方中樹影圓隱几讀書長竟夕閉門覓句可忘年  
幸無駟馬高車客觸忤幽人到眼邊

出嶺

乞得身閒又禦魑干戈瘴癘兩危機三年似涉新冰過  
十口今持舊壁歸天靜不憂鴻北向月明休詠鵲南飛  
只應黃帽青鞋底城郭人民有是非

詠城居

盤碧樓寒結露居虛封水戶食芙蓉錦雲長日來無定  
蘿月通宵色有餘靜拂琴書尋密契時因齋戒具甘蔬  
門穿藜徑裁塵跡車馬無煩問廣閭

秋日郊居

眼前百種併愁予  
風日淒淒野外居  
落鴈沙邊水清淺  
蛻蟬枝上葉蕭疎  
一身病著殘光景  
盡室貧依古屋廬  
物色情懷兩岑寂  
更無人問客何如

避寇遷居郭內風雨淒然鄭顧道餉酒

煙雨昏昏一月梅  
全家避賊寄城隈  
欲尋碧落侍郎去  
遽沐青州從事來  
令我妻孥爭洗盞  
想公伯仲政傳杯  
安能鬱鬱久居此  
且傍茶山松徑回



寓居吳興

相對真成泣楚囚，遂無末策到神州。  
但知遶樹如飛鵲，不解營巢似拙鳩。  
江北江南猶斷絕，秋風秋雨敢淹留。  
低回又作荊州夢，落日孤雲始欲愁。

寓教寺東軒

誰將老境覓菟裘，聊與瞿曇共一丘。  
青士無多自蕭散，紫君雖小亦風流。  
要須憇寂有茅宇，何以落成惟茗甌。  
穩看林間上番筍，惜無餘地可通幽。

宜興邵智卿天遠堂

目極雲沙靜渺然邵卿風月過年年鴈行滅沒山橫晚  
漁艇空濛水接天南國棠陰春寂寂東風瓜蔓日緜緜  
問君許作鄰翁否陽羨溪邊卽買田

發宜興

老境垂垂六十年又將家上鐵頭船客留陽羨祇三月  
歸去玉溪無一錢觀水觀山都廢食聽風聽雨不妨眠  
從今布韞青鞵夢不到張公卽善權

壬戌歲除作明朝六十歲矣

禪室蕭然丈室空薰銷火冷閉門中光陰又似燭見跋  
學問只如船逆風一歲臨分驚老大五更相守笑兒童  
休言四十明朝過看取霜髯六十翁

謁靈康廟

玉霄峯外海西頭卽是衰翁所領州雲水茫茫長發興  
春山疊疊未生愁舊時英物餘千載勝地叢祠尙一丘  
苦雨淒風莫為崇與君同樂亦同憂

登玉霄亭

老荷君恩付赤城瘦筇扶上玉霄亭懸知地接溟溟海  
坐見天橫兩兩星作賦興公虛想像謫官司戶實飄零  
衰翁何幸分符竹一覽東吳未了青

竹軒小睡

好竹迷時手自栽一軒寒碧謝塵埃清風政為我輩設  
小睡忽從何許來已用官茶麾得去莫因家釀挽令回  
呼兒靜掃黃葉徑吾與此君俱快哉

竹軒睡起詩和者既多輒復次韻

雨中好竹不難栽雨後清無一點埃政有賢人林下集  
何嘗俗客洞中來稽山老幹應相憶茂苑新梢未遣回  
歸去南軒曲肱夢蔥蔥鬱鬱氣佳哉

余會稽所寓南軒種竹甚盛

曾表勲畫屏

筆端水遠又山長瀟灑吾宗白面郎薺樹煙中分瑣細  
葉舟沙外見微茫不宜朝士聽雞枕政愜幽人夢蝶牀  
卻恐非關毫素事此身元住玉溪旁

程吉老撫幹以英石見遺層疊可愛報之以此  
几淨牕明丈室間炷香危坐不開關如何密密深深地  
忽有層層疊疊山珍重故人初入手攜持使我得怡顏  
從今石友常相對世上交遊費往還

雪後梅花盛開折置燈下

滿城桃李望東君破臘江梅未上春牕几數枝逾靜好  
園林一雪倍清新已無妙語形容汝不用幽香觸撥人  
迨此暇時當舉酒明朝風雨恐傷神

瓶中梅

小牕水冰青琉璃梅花橫斜三四枝若非風日不到處  
何得色香如許時神情蕭散林下氣玉雪清瑩閨中姿  
陶泓毛穎果安用疎影寫出無聲詩

返魂梅

徑菊庭蘭日夜摧禪房未合有江梅香今政作依稀似  
花乃能令頃刻開笑說巫陽真浪下寄聲驛使未須來  
為君浮動黃昏月挽取林逋句法回

諸人見和返魂梅再次韻

蠟炬高花半欲摧斑斑小雨學黃梅有時燕寢香中坐  
如夢前村雪裏開披拂故令攜袖滿橫斜便欲映牕來  
重簾幽戶深深閉亦恐風飄不得回

鄭侍郎折贈白芍藥

奇葩天遣殿芳叢一朶瑤臺月下逢黃遶腰間空自貴  
紅潮頰上莫爭濃如何風日許妍暖更著衣裳能疊重  
定是揚州玉樓子略無佳句與形容



曾宏甫分餉洞庭柑

黃柑送似得嘗新  
坐我松江震澤濱  
想見霜林三百顆  
夢成羅帕一雙珍  
流泉噴霧真宜酒  
帶葉連枝絕可人  
莫向君家樊素口  
瓠犀微齟遠山顰

齟初舉切斷同齒傷齟也又音所

福帥張淵道送荔子

豈無重碧實瓶罍  
難得輕紅薦一柸  
千里人從閩嶺出  
三年公送荔枝來  
玉為肌骨涼無汗  
雲作衣裳皺不開  
莫訝關情向尤物  
厭看綠李與楊梅

荔子

異方風物鬢成斑，荔子嘗新得破顏。  
蘭蕙香浮襟解後，雪冰膚在酒酣間。  
絕知高味傾瑤柱，未覺豐肌病玉環。  
似是看來終不近，寄聲龍目儘追攀。

又詠荔子

百年中半飽聞渠，名下親承果不虛。  
可愛風流元有種，自然富貴乃其餘。  
肯隨妃子紅塵驛，甘伴先生白鶴居。  
可惜不經山谷賞，照紅鴨綠定何如。

吳傳朋送惠山泉兩瓶並所書石刻

錫谷寒泉雙玉瓶故人捐惠意非輕疾風驟雨湯聲作  
淡月疎星茗事成新歲頭綱須擊拂舊時水遞費經營  
銀鉤蠅尾增奇麗併得晴牕兩眼明

李相公餉建溪新茗奉寄

一書說盡故人情閩嶺春風入戶庭碾處曾看眉上白

茶家云碾茶須令碾者眉白乃已

分時為見眼中青飯羹正晝成空洞

枕簟通宵失杳冥無奈筆端塵俗在更呼活火發銅瓶

鄭顧道招賞瑞香

山城底處不春風未似畱賓鄭驛中  
家釀篤成玉池水

玉池水鄭氏酒名

檻花移得錦薰籠已將故事來招我不著

直略

切新詩去惱公

去年諸公皆有詩促公賞花事從此溪南溪北路桃蹊

一任雨繁紅

得瑞香于四明

錦樹團欒海角州移春檻裏見風流  
兩三翠蓋張前面千百香囊綴上頭  
絕代紅梅相對好妒人山麝莫來休

衰翁若被兒童問，入眼還曾有此不。

張耒年教授置酒官舍，環碧散步上園，煎桃花茶，  
何許清尊對物華。廣文官舍似僧家，向人只合供談笑。  
領客猶能辦咄嗟，光動栴檀盤環碧。水香隨珠履上園花，  
公如不厭過從數。但煮東坡所種茶。

郡中禁私釀嚴甚戲作

結交歡伯無他腸，小槽竊比顧建康。此身忽墮禁酒國，  
何路得到無功鄉。官酤快甚夏酌水，齋釀愜于冬飲湯。

客來且復置是事北焙薦椀春風香

時建上  
送新茗

榮茂實侍郎餉家釀

風牕雪屋坐昏晨一老江湖寂寞濱  
解戰充虛惟有酒  
絕甘分少不無人交情好在貧  
簞谷

茂實所居御  
筆賜名筠谷

臘味

持來麴米春便覺寒家生暖熱故知客裏未全貧

家釀紅酒美甚戲作

麴生奇麗乃如許酒母穠華當若何  
向人自作醉時面  
遣我寧不蒼顏酡得非琥珀所成就更有丹砂相盪磨

可憐老杜不對汝但愛引頸舟前鵝

食筍

花事闌珊竹事初一番風味殿春蔬龍蛇戢戢風雷後  
虎豹斑斑霧雨餘但使此君常有子不憂每食歎無魚  
丁寧下番須留取障日遮風卻要渠

戲作盆池四子和青堂

陂湖春盡水茫茫收拾波濤入小塘睡起微涼馥荷氣  
雨餘斜日麗萍光聊為堂下龜魚主少退階前鴈鷺行

只欠盆行數峯在併持小樹作青蒼

秘省避暑抵暮乃出

蝸廬何以度裨延竟日蓬山一洗湔陰翳樹林無六月  
風涼殿閣是諸天政須深隱似玄豹不用懷歸如杜鵑  
咄咄逼人牛馬走夜牕妨我枕書眠

復熱

墨雲行雨併成空突兀彤雲在眼中瓜李不禁如許熱  
蒲葵能得幾多風通宵看月坐還臥竟日追涼西復東



回首本無寒暑地聽渠亭午汗珠融

兒輩次復熱詩韻再次韻示之

蓐收何在渺層空三伏炎蒸尚未中  
況復今宵無好月不知底處有清風  
看雲暮暮不為雨畏日朝朝還自東  
憶昔給孤園裏夢褰裳覓路踏泥融

八月十五夜月二首

玉露金波不可孤相瞻今夕定何如  
氛埃未淨雨湔洗陰翳小留風掃除  
丹桂看來元了了白榆種得許疎疎

一枯濁酒非難事  
未有新詩報答渠

雲日晶熒固自佳  
幽人有待至昏鴉  
遠分岳際松楓樹  
復亂洲前蘆荻花  
曳履商聲憐此老  
倚樓長笛問誰家  
霜螯玉柱姚江上  
作意三年醉月華

重陽

老去長爭一寸陰  
良辰物色負幽襟  
中秋素月偏離畢  
九日黃花未散金  
蓓蕾不妨供小摘  
茱萸聊復伴孤斟  
重陽何必今朝是  
從此籬邊日訪尋

十月一日

屋角羲娥轉兩輪  
今朝水帝又司辰  
山家嘗稻知良月  
野徑尋梅見小春  
一歲坐看除得盡  
百年正與死為鄰  
誰能思許無窮事  
閑閣開爐但飲醇

長至日述懷兼寄十七兄

老來愈覺白駒忙  
眼看重陽又一陽  
心似死灰飛不起  
技如寒日短中長  
厭看賓客空投謁  
強對妻孥略舉觴  
回首山陰酬勸地  
應憐鴻鴈不成行

辛未年長至日在  
紹興侍兄宴會

雪作

臥聞微霰卻無聲起看階前又不能一夜紙牕明似月  
多年布被冷于冰履穿過我柴門客笠重歸來竹院僧  
三白自佳晴亦好諸山粉黛見層層

雪晴

衾裯一夜冷于冰雪事心知作音佐得成自起穴牕看不  
見卻來敲枕聽無聲下牀走報童心喜開戶驚呼老眼  
明晴日垂簷白銀塔怪奇亦復可憐生

十二月六日大雪

薄晚蓬山下直餘笑看六出點衣裾絮飛簾外無縈絆  
花落階前不掃除松鬣垂身全類我竹頭搶地最憐渠  
短檠便可捐牆角剩有牕光映讀書

歲盡

漏箭更籌日夜催萬牛不挽白駒回梅花雪片歲華盡

萱草柳條春鼎來

案陸游詩新春鼎鼎來原本陶潛詩  
鼎鼎百年內此以春鼎對歲華殆割

用之病裏詩書元不讀貧中尊俎未嘗開年光似此真虛

擲請以丹心學死灰

致仕

妻孥挽我奉真祠老子婆婆正坐誰受祿功無一毫未  
休官事有十年遲尚容款曲懸車地絕勝倉皇易簪時

請祝聖人千萬壽小臣何敢望期頤

訓詞有享壽期頤之語


癸未八月十四日至十六夜月色皆佳

年年歲歲望中秋歲歲年年霧雨愁涼月風光三夜好  
老夫懷抱一生休明時諒費銀河洗缺處應須玉斧修

京洛胡塵滿人眼不知能似浙江不

自號在家衲子

絕勝人間萬戶侯不稱俗士不緇流又隨拄杖去行腳  
未辦把茅來蓋頭但使宗風嗣龐蘊誰能佛事覺裴休  
祇應除卻閒名字一聽人呼作馬牛



茶山集卷六



欽定四庫全書

集部

茶山集卷八

詳校官右中允<sub>臣</sub>薩敏

主事<sub>臣</sub>呂雲棟覆勘

總校官編修<sub>臣</sub>王燕緒

校對官修撰<sub>臣</sub>吳錫齡

謄錄監生<sub>臣</sub>張元功

欽定四庫全書

茶山集卷七

五言絕句

題東臯

市聲俱不聞  
野色良可喜  
聽公北宅住  
還我東臯子

西崦

一重仍一掩  
少有外人知  
杖屨歸來處  
斜陽隱半規

宋曾幾撰

南埭

薰風追晚涼  
愛日引朝步  
瘦策與青鞋  
應知來往路

北垞

不謂蕞爾邦  
有此巋然宅  
江山自比鄰  
風月相主客

松谿

不似居城市  
澄湖上有松  
日斜人影散  
百尺臥蒼龍

竹塢

煙雨百餘年  
茅茨數間屋  
中有在家僧  
蕭然如此竹

梅坡

被雪一枝好令人雙眼明  
未須貪結子對汝不勝清

蘭畹

深林以薌名花木不知數  
一點無俗氣蘭芽在幽處

叢桂

行攀叢桂枝坐息叢桂影  
王孫胡不歸歲晏雪霜冷

海棠洞

玉頰酒潮紅醉頭扶不舉  
杜老豈無詩應為六丁取

柔桑陌

南陌綠成陰園林正春老能令蠶事辦更遣鴉音好

梨花原

酒渴上安市甘寒為解圍鵝兒黃不見空見鷺鷥飛

柑子園

小摘亂青黃開嘗馥香氣持比千戶封真成敗人意

山齋

頗知藏曲折故作小崢嶸一穗香已過半山雲正橫

泛宅

鄉林新賜宅春水向鷗前不是蕭何第元非范蠡船

上饒方君小倅官而不婚宦居偏戶間靜無官宦  
之事舍後梯城而上卽棚為亭盡得溪山之勝名  
之曰快哉為作四小詩以快哉此風為韻

簿書苦沈迷世俗嗟迫隘不如溪山上風至取一快  
掾曹官事了載取麴生來得酒且歡喜俗氛安在哉  
從容吏隱間游戲僧俗裏孤月浪中翻吾心正如此

偏仄何偏仄官居塵土中高城與隔盡惟有一溪風

遺直堂

并序

三孔某之舅氏也伯舅舍人熙寧間實為台州  
從事手植檜于官舍之堂下逮今八十有餘年  
矣某假守是州因以遺直名其堂作詩六章用  
叔向古之遺直為韻以告來者庶幾勿翦焉

三孔吾渭陽猶及見仲叔堂堂舍人公再拜但喬木  
長身一庭中勁氣九霄上思公立朝時凜凜不可向

策登董相科賦作長卿語劉牢出外甥愧我不如古  
老柏蜀人愛甘棠召南思領客清樾下作詩詠歌之  
元祐幾閱歲諸公一無遺吾舅典型在神明力扶持  
柏葉松其身在時公手植雜樹誰所栽一錢初不直

同官皆和復次韻

蒼官可長雄餘子皆季叔所以吾外家深栽後彫木

高標何許看小閣有時上烈風知人懷柯葉盡西向

治州

小閣實與推  
官廳為鄰



孔父昔所遊父老不能語文章翠珉上如此樹高古

台州

修城記兒氏之文也

寂寞西州路淒涼渭陽思敢不酷似舅蒼官實臨之

大厦要直木郢斤棄如遺一朝諫省上王魏不支持

舅氏

應直言極諫科中之緣力詆新法忤時相意罷歸故官元祐中擢大諫

華屋落山丘悲歌詠曹植故有主林神百年依正直

### 玉井

茗飲貴石泉江流亦其亞甘寒如此井未肯出汝下

碧蘆深

春風桃李蹊學語鳥相喚不可無寒蘆汀洲下鳬鴈

通幽花徑

一徑夾青葱無人到幽處花發曉鶯啼欣然得佳趣

虎川

水紋如此云

嘯壑有於菟吹波作奇字川上雪髯翁文章政相似

放魚磯

一絲公不掛釣餌也憐渠舊日垂竿地臨流只放魚

三老亭

華髮累朝人蒼髯幾時樹政恐郢斤尋明堂要材具

題摘蔬亭

幽畦小雨餘一一錦繡段春日細春盤懸知咄嗟辦

題退軒

求名恐顛躋求道戒進取誰知卻行人可以超萬古

題無熱軒

一溪喬木陰六月火雲冷門外有行人寒泉思汲井

寄軒

人家愛吾廬，燭理均是寓。未辨山林居，聊依佛僧住。

企疏堂

鄉林未置身，泛宅先入手。二疏歸來時，能似今日否？

羃翠庭

羃木上參天，清陰併為一。炎曦無路來，不廢風月入。

醉石

冷石磨青瑤，客至相與飲。醉倒不用扶，真成一高枕。

墨坳

有水碧于天玄雲瀚然起定是臨池人一沐管城子

駕月橋

伐木梁清淺扶藤日幾回嫦娥與牛女昔日度橋來

過花橋

溶溶水拍隄了了花隔岸不著小橋通令人方寸亂

歸來橋

吉安府志橋在廬陵縣治之北

安車過橋時童稚皆喜舞題柱作歸來元無長卿語

廿一兄以手和四清香見餉用心清聞妙香為韻

成五小詩

微雨久逾潤禪房低復深下帷香一縷收盡向來心  
花覆春風殿爐薰上紫清舊時香案吏趺坐對煙明  
不屬蔚宗傳又非知見薰從來香一瓣只許自聞聞  
擬去竹塢間煎茶炷新料從容二士談領會一語妙

老柏參深水封題遠寄將發奩知長者閑閣自調香

華嚴

經鬻香

長者

六言絕句

李商叟秀才求齋名于王元渤以養源名之求詩  
自古詞林枝葉皆從根柢中來萬卷須窺藏室一塵莫  
點靈臺

老杜詩家初祖涪翁句法曹溪尙論淵源師友他時派  
列江西

學問直須富有文章政要深藏玉在山中輝潤蘭生林  
下芬芳

廣南韓公圭

璉

舶使致龍涎香三種數珠一串戲

贈

千里傳聞陸凱一枝遠寄梅花虎節無煩驛使龍涎走  
送寒家

花氣薰肌郁郁貫珠入手累累想見范公和處絕勝乃  
祖偷時

黃嗣深尚書自仰山來惠茶及竹薰爐

茗椀中超舌界薰爐上悟香塵坐我集雲峰頂對公小



釋迦身

黃嗣深尚書見訪

騎氣初占客至履聲忽報公來不亂空庭鳥雀何妨滿  
席塵埃

茶山集卷七

欽定四庫全書

茶山集卷八

宋 曾幾 撰

七言絕句

乞梅曾宏甫二首

尋梅不惜上南坡  
傍險衝泥奈老何  
寂寞僧牕禪榻畔  
好枝還解送人麼

臘前臘後無非雪  
溪北溪南併是梅  
知有家山難覓路

敢煩健步送春來

覓梅

欲尋梅去不禁寒  
宜著書籤研滴間  
聞道南坡開似雪  
略分疎影到茶山

消梅花

未見枝間著子初  
聞名已瘵渴相如  
花肌自是冰和雪  
那得生兒不似渠

黃香梅

雪裏何人作道裝  
冰綃重疊色鵝黃  
染時定著薔薇露  
雨洗風吹故自香

尋梅至楊家見數株盛開

芒鞋竹杖尋梅去  
只有香來未見花  
村北村南行欲徧  
數株如雪小民家

落梅

玉頰香肌委塵土  
雪魄冰魂無處所  
一年春事頓成空  
不必飄零似紅雨

墨竹梅

的皪江梅竹外枝，能將幻法轉生機。  
憑君莫作風垂綠，便恐飄零學雪飛。

水芭蕉

寒泉中有小崢嶸，種得芭蕉積漸成。  
一葉似抽人不見，坐牕頭白眼猶明。

鄭侍郎家瑞香花盛開而未賞戲贈二首

瑞香花發去年枝，愜對君家白玉池。

玉池鄭酒名

複幕重簾

開欲徧馨香少有外人知

移春小檻綠樽前記得花頭數尺圓傳語鄭莊修故事  
錦薰籠畔過年年

諸公次韻予復次韻二首

瑣瑣紅英密綴枝春風春物不差池諸君但辦樽前去  
昨夜燈花報客知

梅花過後杏花前嫩蕊裝成一盞圓惱亂春風為渠了  
幽香破睡有明年

曾宏甫見過因問訊鞞紅花則云已落矣驚呼之  
餘戲成三首

茶山老子竟成癡漫說尋芳去不遲  
浪蕊飄殘猶自可名花落盡不曾知

不令老眼看鞞紅豈是青春不負公  
尚有揚州風物在亦防此段併成空

南渡年來兩鬢霜牡丹芍藥但他鄉  
即從江水浮淮水便上維揚向洛陽

置酒簽廳觀荷徐判官攜家釀四首

綠水波深欲上堦  
紅蕖香動要傳杯  
幕中自有兩佳客  
又載青州從事來

鄣日青圓自擁堦  
縐風綠淨可添杯  
被花惱處君知否  
羅襪凌波笑不來

白白紅紅花映堦  
高高下下葉成杯  
嬌嬈似不禁長夏  
故就團團扇影來

休看紅藥詠翻堦  
極目荷花照酒杯  
靜濯明妝何所待



風標公子遠飛來

謝送蠟梅二首

天將何物染江梅  
白玉花成栗玉開  
一種暗香全似舊  
小罌和雪送春來

化工團蠟作寒梅  
絕勝牛酥點滴開  
不是前村深雪裏  
蜜蜂應認暗香來

鄭侍郎送蠟梅次韻三首

折來梅與句爭清  
強和餘音本不能  
欲向都官論一字

略無佳處似詩僧

用前村深雪裏  
昨夜一枝開事

小瓶梅映短檠燈幽興何人似我能枉沐歌詞無用處

維摩詰是在家僧

鄭有念  
奴嬌詞

江梅難以蠟妝成女手雖工未必能香氣惱人眠不著

若為學得定中僧

曾宏甫餉溪山堂南坡胯新茶

溪山堂在南坡曾  
所創也以是名茶

云 胯

溪山寶胯能分我不但禪房破睡魔便覺胃中有丘壑

免教辛苦上南坡

衢僧送新茶

齋腸得飽又逐去午夢欲成還喚回  
定是僧家不堪此  
滿匳青箬送春來

紹興帥相公遺小春新茶且折簡云對瑞香啜之  
大勝暖帳中飲羔兒酒也小詩兩絕以謝

打門將軍得人驚  
十月茶牙照眼明  
漏泄春光凌雪色  
柳條萱草太遲生

酒壓羔兒雪煮茶紅羅斗帳錦籠花中書堂上權衡手  
小物勤公定等差

啜建溪新茗李文授有二絕句次韻

北焙今年但取陳草芽過了二分春為君湔洗丁坑後  
寶勝雲團一樣新

壑源今日為君傾可當杯盤瀉濁清未到舌根先一笑  
風爐石鼎雨來聲

謝宜春宰黃時舉惠冬筍二首

此君老去猶停雪稚子生來亦耐寒記得長蔬山谷老

三珍錯落粲同盤

山谷謝游景叔惠冬筍酥梨詩三珍同盤乃得嘗

竹底春從雪底歸煩君抱送玉嬰兒白頭無復迎船喜

只供江魚作許悲

老杜送王判官扶侍還黔中詩青青竹笋迎船出白白江魚入饌來用孟

宗姜詩兩

孝子事

謝路憲送蟹

從來歎賞內黃侯風味尊前第一流祇合蹢躅赴湯鼎

不須辛苦上糟丘

食淮白魚二首

十年不踏盱眙路想見長淮屬玉飛  
安得玻璃泉上酒  
藉糟空有白魚肥

帝所三江帶五湖古來修貢有淮魚  
上方無復蠙珠事  
玉食光輝卻要渠

食酥二首

貢包分自浙西東函谷金城在眼中  
泛酒煎茶俱愜當  
滿前臘雪化春風

土酥絕類穆家兒好著崔家釘坐梨如夢甘寒千百顆  
雪肌相伴出關西

食楊梅三首

年年梅裏見諸楊火齊堆盤更有香風味十分如荔子  
何妨盛著絳紗囊

一月如繩雨瀉簷只言新竹漸多添豈知政負幽人腹  
不放楊梅蜜樣甜

今歲以積雨  
故此族不佳

饒陽接種江南少越上楞梅天下無梅熟應同兒輩喫

有兄八十住東吳

小饒接梅山陰  
楞梅皆珍果也

食牛尾狸

生不能令鼠穴空  
但為牛後亦何功  
不如醉臥糟丘底  
猶得聲名異味中

謝寄端硯四首

我居南楚君南越  
遣騎持書致石泓  
未識松煤先一笑  
向人鴈鵲眼能明

名聲藉甚端溪硯  
何況珍材琢下晶  
兔穎麝煤俱愜當



使君栽鑒果超凡

端守鄭子禮

治中長嘯得石硯乞與衰翁一笑開  
小試松煤便終日必知渠是下畧來

管城子挾秋霜氣絳縣人含松壑風  
不是端溪石居士

分甘棄置一生中

端倅韓少汲

謝鄭侍郎餉酒二首

尊中政爾空空然忽有一壺來  
眼邊君知情快何所似

石澗怒流深夜泉

鄭堂後有流水曰石澗

鳴鞭走送徒紛然開嘗政足甜中邊甘辛未省有如許

氣壓爛柯山下泉

三衢酒名不老泉

家釀酒鄉四首

惡懷種種占胸次俗物紛紛遮眼邊知有醉鄉無路入  
竹渠昨夜響山泉

酒泉郡郭果何在校尉兵廚安足求即使愁城攻得破  
策勲當拜醉鄉侯

醉鄉即是無何有歡伯相招歸去休全以箇中為境界

更于底處覓溫柔

醉鄉論石仍論斗如此山重水複何我覺去人殊不遠  
從來杯勺不能多

讀書四首

黃卷中人最起予病來相對卻成疎新涼試傍青燈看  
猶有飛蚊小未除

童子區區攻一藝老生汲汲事三餘偶然領會忘言處  
只有淵明解讀書

朝游夕泳一牕書只要今吾勝昔吾未識此間真氣味  
直緣聖處少工夫

勿謂微言久絕絃六經正用此心傳假令壞壁無餘燼  
日月堂堂故麗天

校書戲成

舊時天祿校書郎習氣薰人老未忘可笑當牕楮生面  
卻成宮額半塗黃

病起始浴二首

無數塵埃一病身不蒙湔拂幾經旬  
政須阜莢相料理可笑梁州陰子春

欲著牀頭澣濯衣汗流成雨垢成泥  
呼兒為我供湯事今日身輕好杖藜

雪後月牕戲題

青女翻空一笑開天花散盡更徘徊  
嫦娥相與有瓜葛也向讀書牕下來

題陸務觀草堂

草堂人去客來遊竹筓泉鳴山更幽  
向使經營無陸子  
殘僧古寺不宜秋

人日

雪意垂垂體不佳  
十年人日寄天涯  
老來只有窮相守  
忍使奴星結柳車

寒食日誦老杜示宗文宗武詩寄二子

衰年寒食又清明  
欹枕詩成字不成  
欲寄宗文與宗武  
一春風雨大江橫

春晴

莫春已辦曾點服急雨又墊林宗巾一晴政為吾輩設  
速載家釀羞廚珍

己巳歲夏旱大熱睡起偶成

年年暑去皆有期今年暑去何遲遲不知搖敗幾團扇  
得到西風吹面時

青天無雲日亭午羣巫禱祈且呼舞老夫饒睡昏昏然  
鼻息如雷汗如雨

夏夜聞雨

涼風急雨夜蕭蕭  
便恐江南草木彫  
自為豐年喜無寐  
不關牕外有芭蕉

久雨

小雨飛空十日餘  
苔錢稱意上階除  
芒鞋不踏門前路  
坐聽嘔啞過竹輿

道中遇雨

客子祈晴意未公  
林間布穀勸春農  
雨師若有分風手



留取車輪一道通

鄭顧道衝雨見過

荷橐臨門門未開多泥窮巷遍蒼苔始知猶勝杜陵老  
舊雨客來今亦來

九日二首

尊前韻度落烏紗卻是西風識孟嘉當日龍山無數客  
問誰整整復斜斜

儋耳重陽菊滿頭恰如佳月即中秋歸來唱著中原句

卻道黃花蝶也愁

雪晴

未快溪橋踏雪心  
朝陽已復上遙岑  
可憐昨夜瓊瑤跡  
化作春泥尺許深

鳳凰臺

簫聲無復到層臺  
畫棟空餘燕雀來  
我是鳳凰池上客  
等閒汀鷺莫相猜

疎山一覽亭

青雲梯盡得朱欄不但令人六月寒無限江南好山水  
菴摩勒果掌中看

鳴水驛

一道溪流百轉深  
按藍如色珮如音  
青蔬幾葉來何處  
知有幽人底事尋

蘆溝橋

興馬連年東復西  
巨鼇雙脇夾青猊  
荷旃食肉無非命  
顯額相如不敢題

次菴中二陸韻

問石尋泉到竹齋  
木犀花盡菊花開  
老僧有約君知否  
乘興前村雪裏來

遊張公善權二洞四首

此邦勝處名天下  
今日爭來入眼中  
筇杖一枝舟一葉  
山行衝雨水衝風

縵纓乳蓋張公洞  
風馭雲輶定不無  
勿以衰翁作生客  
舊時相識選仙圖

自疑身是洞中仙才出張公又善權只道石田無用處

種成玉粒至今傳

洞有仙人  
田米堆

善權石狀說不盡怪怪奇奇驚倒人大屋脩廊巖下路  
淒風冷雨洞中春

禽聲四首

勸我行沽聒晝眠看人爛醉買江天興來亦欲提壺去  
未有蘇公乞酒錢

幽禽竟日引圓吭脫袴催人有底忙不但春天無衣著

淒風冷雨絕須防

春泥滑滑強知時  
野日荒荒已露機  
政與鶉鳩同一律  
朝來喚得阿姑歸

有酒如淮肉如坻  
何如麥飯滑流匙  
但看此物豐登日  
即是儂家快活時

三衢道中

梅子黃時日日晴  
小溪泛盡卻山行  
綠陰不減來時路  
添得黃鸝四五聲

途中二首

鵲鳩晴雨報人知  
更問農家底事宜  
村落泥乾收麥地  
稻田水滿插秧時

小麥青青大麥黃  
新蠶滿箔稻移秧  
綠陰馬倦休亭午  
芳草牛閒臥夕陽

治病

七月四日愈作

誰言似病元非病  
一日之間行四時  
不用文殊來問疾  
箇中實怕有人知

老身危似草頭露疾勢來如江上潮寒熱自無安著處  
不然何以脫今朝

詩催

練裙染翰初不惜布袋寫真殊未來併作山房一奇事

臨岐更著小詩催

徐子禮為予作石窟二字許明叔布袋和尚畫像未之得也一絕舉催

道逢王左丞不及避謝之二首

西風黃葉北門街有句無人為翦裁衝突前驅公會否

要求一語定敲推



黃童白叟趁虛回左轄車前撥不開記得綠槐陰御路  
萬人辟易繡鞦來

獨步小園四首

江梅落盡紅梅在百葉緗梅賸欲開園裏無人園外靜  
暗香引得數蜂來

只道江梅發不遲最先零落使人悲從今穠李花千樹  
未抵前村雪一枝

誰將山杏臙脂色來作江梅玉頰紅但得暗香疎影在

不妨妝面對春風

山衣重疊六銖輕  
淡拂槐花染不成  
報答春工選何物  
鵝兒黃酒十分傾

書陸務觀所藏阿羅漢像一軸

大阿羅漢十有六一  
一騰空見人足  
手持貝葉坐禪林  
稱不動尊惟我獨

送李商叟秀才還臨川

一春霧雨暗溪山  
城北城南斷往還  
政是晴時君又去

望君煙艇有無間

題天衣寺

布襪青鞋踏欲無  
登山臨水未成疎  
十峰雙澗天衣寺  
萬壑千巖總不如

再題天衣寺

畫舫珠簾出繚牆  
天風吹到芰荷鄉  
水光入座盃盤瑩  
花氣侵人笑語香

再過翠屏

蠻荒乃有此巔岼石黛因依碧玉寒須信佳山如絕色  
憑誰貌取一生看

求李生畫山水屏

乞君山石洪濤句來作圍牀六幅屏持向嶺南煙雨裏  
夢成江上數峰青

書左舉善秀才乞米圖

乞米魯公書作帖睇顏處士畫成圖若教渾似侏儒飽  
還有流傳翰墨無

書徐明叔訪戴圖

小艇相從本不期  
剡中雪月並明時  
不因興盡回船去  
那得山陰一段奇

乞貓二首

春來鼠壤有餘蔬  
乞得貓奴亦已無  
青蒻裹鹽仍裹茗  
煩君為致小於菟

江茗吳鹽雪不如  
更令女手綴紅裙

與繡字同

小詩卻欠涪

翁句為問銜蟬聘得無

木魚戲成

緣木求魚卻得魚擊鮮日日向齋盂可憐鉤掛濠梁上  
大勝馮驩每食無

怪石

眼前突兀見此石怪怪奇奇俱可人為問何如潘騎省  
世間妍醜本非真

竹奴

因讀山谷竹奴脚婆詩戲作山谷既以竹夫人

為竹奴余亦名腳婆為錫奴焉

霧帳桃笙晝寢餘此君那可一朝無秋來冷落同班扇  
歲晚溫柔是錫奴


綠毛龜

若為介物成毛物顏色按藍省見稀定是多生捕魚子  
至今猶著綠蓑衣

白龜

一種龜兒玉雪然故人為寄小如錢會當放汝江湖去

小住盆池慰眼前





茶山集卷八